

Uunga siunnersuut: Sermip erngullu avammut nioqutissatut atorneqarnissaat pillugu Inatsisartut inatsisaata allangortinneqarneranik Inatsisartut inatsisaat nr.xx, yy 2016-imeersoq

(Inuusutissarsiornermut, Suliffeqarnermut, Niuernermit Nunanullu Allanut Naalakkersuisoq)

Saqqummiussissut

(Inuusutissarsiornermut, Suliffeqarnermut, Niuernermit Nunanullu Allanut Naalakkersuisoq)

Siullermeerneqarnera

Imerk avammut niuerutiginnittartut namminneerlutik tunisassioarnissaat tamatumalu kingorna Kalaallit Nunaanniit nunani allani avammut niuerutiginnittarfinnut imermik aamma/imaluunniit sermimik avammut niuerutiginnittarnissaannut tunngatillugu, sermip erngullu avammut nioqutissatut atorneqarnissaannut inatsit maannakkut atuuttoq ilusilersugaavoq. Taamaattoq misilittakkat takutippaat aqqissuussineq taanna imermik Kalaallit Nunaanneersumik nunarsuarmi niuerfimmum avammut niuerutiginninnermut kissaatigineqartutut sulii iluatsitsiviusimangitsoq.

Taamatut iluatsittumik ingerlasoqalernissaanut aammalu sermimut imermullu piujuartitsiviusumik avammut niuerfeqalersinnissaanut ilaatillugu, niuerfinnik misissueqqissaarneq Naalakkersuisut suliarileruttorpaat, tassani Kalaallit Nunaanni imermik aallerfissanut periarfissat misissorneqarlutik. Misissueqqissaarnerit taakkua 2016 naatinnagu sermimut imermullu periusissami ataatsimoortumi saqqummiunneqassapput.

Taamaattoq suliaqartuusut namminersortut avammut niuerutiginninnissaq siunertaralugu imermik pilersorneqarnissaq pillugu pisortat pilersuinnermut ingerlatseqatigiiffiit isumaqatigiissuteqarsinnaanerannut inatsimmi tunngavissamik inatsit atuuttoq imaqarpoq, aammalu inatsimmi tunngavissap taassuma erseqqissarneqarnissaa siunnersuummi siunertaavoq.

Kissaatigineqarpoq inatsimmi tunngaviusut ersarinnerulerneranni, ingerlatsinnermut ilusiliaq pisarinnerusoq aammalu isumalluutiniq atuiffiunnginnerusussaq tunngavigalugu,

imermik avammut niuerutiginninnissamut periarfissat
aallunneqarnerulersinneqarsinnaassasut.

Maannamut pisartutut imeq puiaasaniitillugu taamatullu imeq poortorneqariinngitsaq
avammut niuerutigineqarsinnaassapput.

Erseqqissarneqassaaq siunnersuut taamaallaat, imermik tunisassiornermit pioreersumit
tunisassiarineqartunut imermut sinneruttumut tunngassuteqarmat. Pilersuinnermut
ingerlatseqatigiiffiit taamaattumik aamma niuernermi imaluunniit tunisassiornermi
annaasaqaataasinnaasunik pisussaaffeqalertussaangillat.

Peqatigisaanik erseqqissarneqassaaq pisortat pilersuinnermut ingerlatseqatigiiffiisa
pilersuinissamut pisussaaffii allannguuteqartussaangimmata, taamaattumillu Kalaallit
Nunaanni innuttaasut suliffeqarfiillu, ilanngullugit assersuutigalugu aalisakkeriviit,
pilersorneqarnerat maannamut pisartutut imermik avammut niuerutiginnittuusinnaasunit
salliutinneqartussaallutik, aammalu imeq sinneruttoq tassani pineqarluni.

Taamatut oqaaseqarlunga siunnersuut Inatsisartuni kajumissuseqartumik
suliarineqartussangorlugu tunniuppara.